

KERESETE YO O TSHELANG

BOPAKI JWA BAAPOSETOLE

KEREKE YA GA JESU KERESETE YA BAITSHEPHI BA METLHA YA BOFELO

Jaaka re keteka matsalo a ga Jesu Keresete dingwaga tse di sekete tse di fetileng, re naya bopaki jwa rona jwa bonnete jwa botshelo jwa Gagwe jo bo senang selekano le bomolemo jo bo senang bokhutlo jwa setlhabelo se segolo sa tefo ya Gagwe. Ga go ope yo o neng a na le tlhotlheletso e kgolo go botlhe ba ba tshedileng mme ba tla tshela gape mo lefatsheng

O ne a le Jehofa yo Mogolo wa Kgolagano e Kgologolo, Mesia wa Kgolagano e Ntsha. Ka fa tlase ga kaelo ya Rraagwe, O ne a le mmopi wa lefatshe. “Dilo tshotlhe di dirilwe ka ene, mme kwantle ga gagwe ga go a dirwa sepe sa tse di dirilweng” (Johane 1:3). Le mororo a sena sebe, O ne a kolobediwa gore go diragadiwe tshiamo yotlhe. O ne a “tsamaya motikologong a dira molemo” (Ditirafalo 10:38), fela a nyadiwa go seo. Efangele ya gagwe e ne e le molaetsa wa kagiso le tshiamo. O lopile botlhe go sala sekai sa Gagwe morago. O ne a ralala Palesetina ka dinao, a fodisa ba ba lwalang, a dira difofu di bone, mme a tsosa baswi. O rutille bonnete jwa metlha ya bosakhutleng, bonnete jwa go nna teng pele ga botshele jo, maikaelelo a botshelo jwa rona mo lefatsheng, le kgololego ya barwa le barwadi ba Modimo mo botshelong jo bo tlang.

O ne a tlhoma selalelo jaaka segopotso sa setlhabelo sa Gagwe se segolo sa tefo. O ne a golegwa mme a sotlwa ka ditatofatso tse eseng tsa boammaaruri, ba mo athhola go kgotsofatsa segopa, mme a athholelwa go swa mo sefapanong kwa felong fa go bididwang logata. O ne a neela botshelo jwa Gagwe go swela dibe tsa batho botlhe. Sa gagwe ene ele neo e e neilweng mo boemong jwa botlhe ba ba tla tshelang mo lefatsheng.

Re paka ka tshisibalo gore botshelo jwa Gagwe, jo eleng bogare jwa history ya motho, ga bo a ka jwa simolola kwa Betlehema kana jwa felela kwa Calvary. O ne a le leitibolo la ga Rara, Morwa yo o tshotsweng a le Esi mo Nameng, Morekolodi wa lefatshe.

O tsogile mo lebitleng go “nna lebutswa - pele mo go ba ba robetseng” (Bakorinthe 15:20). Jaaka Morena yo o Tsogileng, O etetse bao a neng a ba rata ka nako ya fa a tshela. O ne a ruta gape “dinku tse dingwe” tsa Gagwe (Johane 10:16) kwa America wa bogologolo. Mo lefatsheng la gompiano, E ne le Rraagwe ba bonetse go mosimane Joseph Smith, ba simolola tsholofetso ya bogologolo “tebalelo ya botlalo jwa dinako” (Baefeso 1:10).

Ka Keresete yo o Tshelang Moporofeti Joseph o kwadile : “Matlho a gagwe a ne a tshwana le kgabo ya molelo” moriri wa gagwe o le mosweu jaaka kapoko sefatlhogo sa gagwe se ne se phatsima go feta phatsimo ya letsatsi; mme lentswe la gagwe le le modumo jaaka metsi a magolo a a tabogang; le lentswe la Jehofa tota , le re:

“Ke nna tshimologo le bokhutlo; ke nna yo o tshelang, ke nna yo ke neng ke bolailwe; ke nna mmueledi wa gago go Rara” (D&C 110:3-4).

Ka Ene Moporofeti o ne a tlhalosa: “Mme jaanong, morago ga bopaki jo bontsi jo bo neilweng ka ga gagwe, se ke bopaki, jwa bofelo, jo re bo nayang ka ga gagwe: Gore o a tshela!

“Ka re mmone, mo letsogong la moja la Modimo; mme re utlwile lentswe le naya bopaki gore ke ene Morwa O Esi wa ga Rara—


“Ka gore ka ene, le mo go ene, le ka ga ene, mafatshe a ne a bopiwa, le baagi ka jalo ke barwa le barwadi go Modimo” (D&C 76:22-24)

Re tlhalosa ka mafoko a tshisibalo gore boperesiti jwa Gagwe le Kereke ya Gagwe e tsosolositse mo lefatsheng—“agilwe mo motheong wa . . . baaposetole le baporofeti, Jesu Keresete eleng lentswe la sekhutlo la one” (Baefeso 2: 20).

Re paka gore letsatsi lengwe O tla boela mo lefatsheng. “Foa kgalalelo ya Morena e tlaa senolwa , e bonwa ke batho botlhe mmogo” (Jesaya 40:5). O tla busa jaaka kgosi ya dikgosi mme a rene jaaka Morena wa Marena, mme mangole otlhe a tla khubama mme maleme otlhe a tla bua go obamela fa pele ga Gagwe. Mongwe le mongwe wa rona o tla ema go athholwa ke Ene go ya ka ditiro tsa rona le dikeletso tsa dipelo tsa rona.


Re naya bopaki, jaaka Baaposetole ba gagwe ba tlhomilweng sentle—gore Jesu ke Keresete yo o Tshelang, Morwa wa Modimo yo o sa sweng. Ke kgosi e kgolo Emmanuele, yo o emang gompiano mo letsogong la moja la ga Rraagwe. Ke ene lesedi, botshelo, le tsholofelo ya lefatshe. Tsela ya gagwe ke mmila o o isang kwa boitumelong mo botshelong jo le botshelo jwa bosakhutleng mo lefatsheng je le tlang. Modimo a lebogelwe neo e e senang bolekanane ja semodimo jwa ga Morwa wa Gagwe.


FIRST PRESIDENCY



Ferekgong 1, 2000

LEKGOTLA LA BA BA LESOME LE BOBEDI





KEREKE YA GA
JESU KERESETE
YA BAITSHAPI
BA MALATSI A BOFELO

TSWANA

